

Gregorio Wolff ta indica

GOBIERNO A DICIDI CU AEROPUERTO LO BIRA UN N.V.

SEPA ta cla pa presenta un CAO na e trahadornan di aeropuerto

ORANJESTAD(AAN) -- Lider di sindicato SEPA, Gregorio Wolff, a duna di conoce cu siman pasa e sindicato a reuni cu Ministro Nicolaas y a papia ariba diferente topico entre otro e situacion na aeropuerto.

SEPA den e reunion tabata kier sa e opinion di Gobierno pa loke ta e futuro di aeropuerto.

Segun Wolff, Ministro Nicolaas concretamente a bisa nan cu aeropuerto lo bay bira un N.V.

E motibonan pa esaki ta cu e infraestructura na aeropuerto mester ser drecha, amplia y mehora. Pa esaki mester di inversionnan y ta dificil pa haya inversionnan pa un empresa cu ta cay bao di Gobierno.

Esaki entre otro debi na e posicion di Hulanda pa no duna fianza mas pa infrastura na Gobierno di Antiyas y Aruba. Hulanda su punto di bista ta cu e fianzanan aki mester ta pa companianan anonimo.

Segun Wolff, Gobierno su punto di bista ta cu debi na e politica di Hulanda aeropuerto mester bira un N.V.

Gobierno a mostra SEPA cu aeropuerto ta bira un N.V. pero ta keda un empresa estatal, esta cu no por papia aki di privatisacion.

Pa loke ta trata e parti economico y financiero, Gobierno lo keda 100 % doño. Na e momentonan aki aeropuerto tambe ta cay den presupuesto di Gobierno pero den futuro como empresa estatal, aeropuerto lo no cay mas den presupuesto.

Lo tin un junta di comisariado cu lo mester supervisa y controla e maneho na e empresa aki. Wolff a sigui bisa cu SEPA a ser informa cu e intension ta cu aeropuerto lo worde administra mas eficientemente.

Wolff a mostra cu SEPA por bira cu e parti aki ya cu SEPA su punto di bista ta cu aeropuerto mester keda empresa estatal.

E consecuencia cu aero-

puerto lo bira un N.V. ta cu lo bin cambio den e parti legal esta "publiek recht" pa "privaat recht".

Esaki ta trece cune cu lo mester bin un otro convenio di trabao. Un contracto

colectivo pa e trahadornan na aeropuerto ta un mester.

SEPA lo bay acerca e trahadornan di aeropuerto ya cu e sindicato ya ta prepara caba pa e paso aki. Wolff a indica

cu den algun siman SEPA por prepara un concepto di CAO pa cuminsa cu e proceso pa asina e trahador ta mira kico e ta bay haya pa asina no haya nan mes den situacionnan confuso.